



Vrijednost prvih deset dana zul-hidžeta (Medina)

Hatib: dr. Abdullah ibn Abdurrahman el-Buajdžan

1. zul-hidždže 1445. po Hidžri / 7. juni 2024.

Hvala Allahu Koji nas je uputio u islam, počastio nas imanom, naredio nam da hodočastimo Njegovu Svetu kuću i učinio je kiblom i stjecištem ljudskih srca, pa joj vjernici hrle iz najudaljenijih mjesta i svake godine. Utječemo se Allahu od zla naših duša i naših loših djela. Koga Allah uputi na Pravi put, niko ga ne može u zabludu odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Koji nema druga, i svjedočim da je Muhammed Njegov rob i poslanik, kojeg je On poslao sa uputom i istinitom vjerom da je uzdigne iznad svih vjera, pa makar bilo krivo mnogobošcima. Neka su Allahov blagoslov, milost i spas na njega, na njegovu porodicu, ashabe i sve one koji ih slijede u dobročinstvu do Sudnjeg dana.

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su novotarije, svaka novotarija je zabluda, a svaka zabluda vodi u Vatru.

O vjernici, oporučujem sebi i vama bogobožnost, koja je najbolja poputnina, i pokornost Njemu, što je najuzvišeniji cilj i želja. "O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite." (El-Hašr, 18)

O ljudi, Allah ima "daške" milosti, pa im se izložite, i razdoblja dobrote, pa ih tražite, i vremena milosti, pa budite revni prema njima. Oni su pokucali na vaša vrata, pa ih primite, i oni su se spustili među vas, pa ih iskoristite. Nalazite se u deset dana zul-hidžeta, najboljim danima u godini, u kojima je Allah Uzvišeni spojio ibadete koje nije spojio u drugim danima. To uključuje namaz, hadž, sadaku, post i druge vrste dobrih djela. Allah se njima zaklinje u Kur'anu, i kaže: "Tako Mi zore, i deset noći..."





(El-Fedžr, 1–2). Ibn Abbas, radijallahu anhum, prenosi da je Poslanik, sallallahu alejhi ve sellem, rekao: "Nema vrednijeg djela od onog učinjenog u ovim danima." Rekli su: "Pa čak ni džihad na Allahovom putu?" "Pa čak ni džihad na Allahovom putu, osim čovjeka koji izađe u borbu na Allahovom putu, sa životom i imetkom, i ne vrati ništa od toga." (Buhari) U drugom hadisu koji prenosi Džabir, radijallahu anhu, navodi se da je Poslanik, sallallahu alejhi ve sellem, rekao: "Deset prvih dana zul-hidžeta najbolji su dani na dunjaluku." (Bezzar)

O vjernici, Allah vam je podario odabrana vremena, pa ih iskoristite, i dašak dobročinstva, pa mu se izložite. Ovo su "određeni dani", puni milosti i blagoslova, i od vjernika se očekuje da ih iskoristi na najbolji mogući način, i da ne upropasti nijedan njihov trenutak. Stoga, požurite sa činjenjem dobra prije isteka svih rokova, i obračunajte sami sebe prije nego što budete polagali račun za svoja djela. Uzvišeni Allah kaže: "A dobro koje za sebe unaprijed osigurate naći ćete kod Allaha još većim i dobit ćete još veću nagradu." (El-Muzzemmil, 20) I kaže: "... i nastojte zaslužiti oprost Gospodara svoga i Džennet prostran kao nebasa i Zemlja, pripremljen za one koji se Allaha boje, za one koji, i kad su u obilju i kad su u oskudici, udjeljuju, koji srdžbu savlađuju i ljudima praštaju – a Allah voli one koji dobra djela čine." (Ali Imran, 133–134)

Poštovani vjernici, jedan od preporučenih ibadeta i potvrđenih sunneta jeste klanje kurbanda, a kurban je životinja, od vrste stoke, koja se žrtvuje u danima Bajrama, i predstavlja zahvalnost Svemogućem Allahu i vid gozbe za sebe i svoju porodicu, te je jedna od manifestacija radosti i sreće. Poslanik, sallallahu alejhi ve sellem, podsticao je na klanje kurbanda, a i sam se trudio da to primijeni u praksi, pa je klao kurban za sebe i svoje ukućane. Onaj ko ima namjeru žrtvovati kurban, nakon što nastupi zul-hidže, trebao bi se suzdržati od šišanja i uklanjanja dlaka sa tijela i rezanja noktiju, na osnovu hadisa Ummu Seleme, radijallahu anha, u kome se kaže: "Ko bude imao kurban, koji će žrtvovati, a nastupio je zul-hidže, neka ne uklanja dlake ili nokte sa tijela sve dok ne prinese žrtvu." (Muslim)





O muslimani, deset prvih dana zul-hidžeta dani su veličanja i spominjanja Allaha. Uzvišeni kaže: "... da bi u određene dane, prilikom klanja kurbana, kojim ih je Allah opskrbio, Njegovo ime spominjali." (El-Hadž, 28)

Ibn Omer, radijallahu anhum, prenosi da je Vjerovjesnik, sallallahu alejhi ve sellem, rekao: "Nema boljih i odabranijih dana niti dana u kojima je Allahu draže dobro djelo od ovih deset dana. Učite u njima što više tesbiha (subhanallah), tehlila (la ilahe illallah), tekbira (Allahu ekber) i tahmida (elhamdulillah)." (Ahmed)

O ljudi, dva sveta hrama najbolja su i najčasnija mjesta na licu zemlje, kojima hodočasnici, mu'temiri i hadžije, hrle sa svih strana svijeta, radi ibadeta Allahu i izvršavanja obreda. Služiti hadžijama velika je počast od Allaha za Kraljevinu Saudijsku Arabiju, koja vodi veliku brigu o hodočasnicima, odazivajući se riječima Allaha Uzvišenog: "I učinili smo Hram utočištem i sigurnim mjestom ljudima. 'Neka vam mjesto na kojem je stajao Ibrahim bude prostor iza koga ćete namaz obavljati!' – I Ibrahimu i Ismailu smo naredili: 'Hram Moj očistite za one koji ga budu obilazili, koji budu tu boravili i koji budu molitvu obavljali.'" (El-Bekara, 125)

Nikada kroz historiju sveta mjesta nisu mogla prihvatiti ovoliki broj hadžija, mu'temira i posjetilaca, kao što je to slučaj danas, pružajući im sigurnost i zdravstvenu negu, olakšavajući im usluge, pomažući im u obavljanju obreda i ibadeta, pružajući im edukativne programe i posebne kurseve za vodiče, olakšavajući putne procedure i prijevoz od njihovih zemalja – kako bi mogli obaviti svoje obrede s lakoćom i sigurnošću. Zahvaljujemo Allahu Uzvišenom na sigurnosti i blagostanju koje je podario ovoj blagoslovljenoj zemlji i upućujemo dove Allahu za njene vladare, zbog napora koje ulažu u služenju ovim časnim mjestima i njihovim posjetiocima, hadžijama i mu'temirima. Neka Allah nagradi najboljom nagradom slugu Dva sveta hrama i njegovog prijestolonasljednika za ove velike napore, i za sve što čine u njihovoj službi, a neka Allah nagradi i sve one koji su zaslužni i doprinose ovim naporima, od vojnika, osiguranja, zdravstvenog osoblja i svih drugih sektora, i neka su blagoslovljeni svi koji su se uložili i najmanji trud i imaju i najmanju zaslugu u





ovim postignućima na prostoru Meke i u džamiji Božijeg Poslanika, sallallahu alejhi ve sellem.

Hodočasnici Allahove Svete kuće, hadž je uzvišeni ibadet u islamu, koji je Allah propisao i uzvisio njegovo vrijeme i mjesto, pa je rekao: "Hadž je u određenim mjesecima; onom ko se obaveže da će u njima hadž obavljati nema snošaja sa ženama i nema ružnih riječi, i nema svađe u danima hadža. A za dobro koje učinite Allah zna. I onim, što vam je potrebno za put, snabdijte se. A najbolja opskrba je bogobožnost. I Mene se bojte, o razumom obdareni!" (El-Bekara, 197)

Poštovani vjernici, hadž je jedan od najuzvišenijih obreda, svetinja i simbola islama, a Allah je objavio suru s njegovim imenom, El-Hadždž, u kojoj je objavio mnoge ajete.

Čestitam vam, hodočasnici Svete Božije kuće, na tome što vas je Svemogući Bog uputio da Mu se pokoravate, nastojite izvršiti Njegov propis i odazvati se na Njegov poziv: "Reci: 'Neka se zato Allahovoj blagodati i milosti raduju, to je bolje od onoga što gomilaju.'" (Junus, 58)

Čestitam vam na tome što vam je Allah olakšao obavljanje hadža i odabrao vas za izvršenje jednog od obreda islama.

Čestitam vam što ste došli na najbolja i najčasnija mjesta, u Božiju Svetu kuću i mjesta izvršavanja obreda.

Čestitam vam što ćete boraviti na Arefatu, pa će se Uzvišeni Allah pohvaliti zbog vas Svojim melekima, govoreći: "Pogledajte Moje robove, došli su k Meni nepočešljani i prašnjavi, iz najudaljenijih mjesta, uzimam vas za svjedoke da sam im oprostio."

Čestitam vam jer izvršavate ibadet kojim se brišu grijesi, iskupljuju loša djela, a dove se uslišavaju.

Hodočasnici Allahove Svete kuće, iskoristite priliku i marljivo se trudite u izvršavanju obreda, posvetite se ibadetu i izbjegavajte sve ono što će vam upropastiti dragocjeno vrijeme, bilo da je riječ o besposlici ili grijehu: "Onom ko se obaveže da će u njima hadž obavljati nema snošaja sa ženama i nema ružnih riječi, i nema svađe u danima





hadža" (El-Bekara, 197), i nastojte da u svakom svom djelu budete iskreni, slijedite sunnet i da se klonite novotarija.

Svaki ibadet koji činimo Allahu, džellešanuhu, mora biti u skladu sa onim što je On propisao Svome Poslaniku, sallallahu alejhi ve sellem, i u skladu sa šerijatskim principima. Ko učini nešto što nije u skladu s praksom, sunnetom, našeg poslanika Muhammeda, sallallahu alejhi ve sellem, to mu neće biti kabul, primljeno, a također Uzvišeni Allah neće prihvatiti bilo koje djelo koji sadrži i najmanju primjesu mnogoboštva, jer Allah kaže: "Ja sam najneovisniji od toga da Mi se iko kao drug pripiše. Ko uradi neko djelo i u njemu Mi pripiše druga, ostavit ću i njega i onoga koga Mi je pripisao kao druga."

Bojte se Allaha i ne pridružujte Mu nikoga i ništa.

Hodočasnici Svete Božije kuće, pridržavajte se instrukcija i uputa koje vam pomažu u poboljšanju usluga i olakšavaju vam procedure, izbjegavajte kršenje tih procedura i pridržavajte se uputa nadležnih tijela.

Neka ste uvijek pod Njegovom brigom i zaštitom, i Allah ukabulio vaše obrede i vratio vas vašim porodicama zdrave i oplemenjene dobrotom!

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

